



# Il virus ha enta pugn la Surselva

Il coronavirus ha sut controlla il mintgadi en Svizra, el Grischun ed era en Surselva. Denter Laax e Tujetsch datti actualmeins var 230 cass activs. Las retschercas dalla FMR muossan che la situaziun semida da di tier di.

MARTIN GABRIEL/FMR

Ils meinascolas, menaders da casas da vegls e da tgira sco era dil Spital regiunal Surselva ein per motivs da lur secret da professiun precauts cun dar informaziuns. En general vegn ei deplorau che la situaziun da partenza avon ils firaus Nadal ei insumma buca buna.

## Menaschi pli u meins regular en las scolas

Il post da coronavirus dil cantun Grischun ha communicau l'jamna vargada che biabein ina tiarza dallas infecziuns actualas seigien da catter tier scolaras e scolar. En la scola Lumnezia sco era en la scola da Glion semida la situaziun dil virus dad jamna tier jamna. La menadra da la scola Lumnezia, *Claudia Cabalzar* ha detg, che siu team da scola stoppi el mument esser fetg flexibels e reagir sin novas infecziuns. «Tendenzialmeins havein nus dapliras infecziuns en il scalem bass. Grazia alla strategia da testar ed alla buna collavuraziun era cun ils geniturs savein nus denton tener sidretg il menaschi da scola regular. Serrada ei sulettamein la scoletta.» Era la responsabla per la strategia da testar ella scola da Glion, *Isa Cavelti*, dat en la medema crena. «Nus havein stuiu serrar ina classa ni l'otra las davosas jamnas pervia da scolaras ni scolar malsaus. El mument datti in pèr singuls cass da corona sin il scalem da scola superiur.» Tenor Cavelti hagi ins adina saviu exequir l'instrucziun tenor urari. *Erica Cavegn* ch'ei presidenta dil Consorzi da scola Sumvitg-Trun ha detg

a la FMR che en las partiziuns da siu consorzi da scola hagi ins giu grond cletg entochen ussa. «Era tier nus hai dau singuls cass d'infecziuns denter las 140 scolaras e scolar. Quels ein denton vegni isolai fetg spert ed aschia havein nus saviu evitar ch'il virus sederasi.»

## Il virus entra senza spluntar

Era en pliras casas da vegls e da tgira en Surselva ei il coronavirus seprentaus senza spluntar las davosas jamnas. Aschia en Casa Sogn Martin a Trun, nua ch'il meinacasa *Donat Nay* ha confirmau alla FMR ch'ins hagi actualmeins negins cass d'infecziun pli. Il meinacasa dalla casa Puntreis a Mustér, *Gian-Reto Nufer* ha detg, che sia instituziun hagi giu negins cass dil coronavirus entochen dacheu. Quei grazia alla buna collavuraziun dil persunal ed ad in concept da proteccziun rigurus che seigi secumprovaus. Ed era il Da Casa Val Lumnezia ha puspei ina situaziun pli quieta che aunc avon paucas jamnas, ch'ins ha giu in triep malsaus da corona. «Nossa situaziun ei quasi normala ussa», ha la menadra dil Da Casa, *Ruth Lichtensteiger* ditg alla FMR. Dapi ils 15 da november ei il Da Casa puspei aviarts per visetas.

## Infecziuns suenter la vaccinaziun en Claustura da Glion

«Nus essan pertuccai actualmeins da pliras infecziuns dil coronavirus», ha la priura generala dalla Claustura dallas soras dominicanas a Glion, sora *Annemarie Müller* scret en ina risposta alla FMR. Quei senza dir precis da contas infeczi-

uns ch'ei settracta. «Nus havein rinforzau aunc pli fetg las mesiras da segirtad en nossa casa Sentupada ed en claustura.» Las soras dominicanas seigien viroladas e perquei seigien ils decuors dil virus mi-geivels. La priura generala spera en scadin cass che sia cuminonza hagi surmuntau il «peak» d'infecziuns el mument.

## Negins respiraziuns encunter covid el spital da Glion

Il spital regiunal Surselva ha actualmeins quater persunas cun ina infecziun da coronavirus en tgira staziunara. Il caumiedi da la medischina *Thomas Koch* ha detg alla FMR, che las persunas en tgira staziunara stoppien per regla vegnir observadas, denton buca sustegnidas tar il respirar. «Ils pazients che drovan la macchina da respiraziun vegnan tractai tuts a Cuera en il Spital cantunal. Actualmeins ha tgira staziunara da nies spital aunc plazz per quater entochen sis pazients da covid-19.»

